

JA' LI SCHIBAL SCARTA LI PEDROE

1 Jo'on Simón Pedroun. Jo'on yajtunelun li Jesucristoe, jo'on ta xcalbe batel li sc'ope. Chajc'oponic batel ta carta yu'un co'ol xa jch'unojtic ti ja' Dios cu'untic li Jesucristoe schi'uc ti ja' Cajcoltavanejtique, yu'un co'ol xa oyutic ta yo'on. ²Ac'o yac'boxuc ep slequilal yutsilal schi'uc ac'o spasboxuc ta jun avo'onic li Diose schi'uc li Cajvaltlic Jesuse, yu'un laj xa avojtaquinic.

**Ja' sc'oplal li c'usi sc'an
ti ac'o spasic li buch'utic
coltabilic xa yu'un li Diose**

³Ti icojtaquintic xa li Dios li ech'em stsatsale, ja' yu'un yac'ojbutic scotol li c'usi ta xtun cu'untic yo' jech xu' cu'untic ta jpastic li c'usi leque, jo'otlic li laj xa yic'utique. Toj lec yo'on, ja' yu'un lijyic'utic. ⁴Ta sventa ti toj lec yo'one, laj xa scoltautic jech chac c'u cha'al yaloj ono'oxe. Pero toj lec yu'un ituq'uib xa co'ontic jech chac c'u cha'al tue' yo'on stuque. Ja' yu'un mu xa jpastic li c'ustic chopol ti ta jc'an jtuctique. ⁵Ja' yu'un sc'an ja' chavac' ta avo'onic spasel li c'ustic leque yu'un laj xa ach'unic ti ja' chascoltaic li Diose.

Pero ma'uc no'ox sc'an chapasic li c'usi leque, sc'an nojtoc ti ac'o más chava'ibeic smelol ti c'usi tsc'an Dios ti chapasique. ⁶Pero ma'uc no'ox sc'an ti más chava'ibeic smelol li c'usi tsc'an li Diose, sc'an nojtoc ti chapajes abaic ta spasel li c'ustic chac'an atuquique. Mi apajes abaique, jech más ta stsatsub avo'onic ta stojol li Diose. Mi itsatsub avo'onic ta stojol li Diose, jech co'ol avo'onic schi'uc. ⁷Mi co'ol avo'onic schi'uc li Diose, jech lec chavilic scotol li buch'utic co'ol quich'ojtic ta muc' li Cajvaltlic jchi'uctique. Mi lec chavilic scotol li buch'utic co'ol quich'ojtic ta muc' li Cajvaltlic jchi'uctique, chac'uxubin abaic.

⁸Mi jech oy ta avo'onique, mi ja' chapasulanic oe, mu alticuc ti laj xa avojtaquinic li Cajvaltlic Jesucristoe. Lec chatuneic yu'un. ⁹Yan li buch'utic mu jechuc li yo'onique, ja' jech chac c'u cha'al li ma'sat li mu xil osile, mi jech chac c'u cha'al li buch'u mu xc'ot sat ta nome. Yu'un ch'ayem xa ta yo'onic ti ipasbatic perton scotol li c'ustic chopol ispasic ta vo'onee. ¹⁰Ja' yu'un, quermanotac, ac'o me ta avo'onic spasel jech chac c'u

cha'al laj calboxuque yo' jech más chana'ic ti t'ujbiloxuc yu'un li Diose, ti oyoxuc xa ta sc'obe. Ti mi jech avo'onique, mu xchibaj avo'onic.

¹¹Jech li Cajvaltíc Jesucristoe, ja' li Cajcoltavanejtique, xmuybaj no'ox chayiq'uic ochel li yo' bu ta spas mantal sbatel osile.

¹²Li c'usi chacalbeique mu xlaj co'on ta yalel. Manchuc mi xana'ic xa, manchuc mi oy xa stsatsal avo'onic ta stojol li Diose ta sventa li sc'op ti ja' melele, scotol c'ac'al jech chacalbeic yu'un jech co'on. ¹³Jnopoj ti sc'an jech chacalulanbeic o ti c'u to sjalil ti li' to cuxulune. ¹⁴Yu'un li Cajvaltíc Jesucristoe laj xa yac'bun quil ti po'ot xa chichame. ¹⁵Ja' yu'un ta xca'be yipal sts'ibael li c'u yepal xu' cu'üne, jech xu' chaq'uelic li c'alal chamemun xae.

Ja' sc'oplal ti "iquil ta jsat jtuccutic ti i'ac'bat xojobal li Cristoe", xi li Pedroe

¹⁶C'alal laj calboxuc ava'iic ti ech'em stsatsal li Cajvaltíc Jesucristoe, schi'uc li c'u sba ta xcha'tal schi'uc stsatsal sju'ele, mu lo'iluc no'ox ca'iojcutic. Muc bu lo'lobiluncutic. Iquil ta jsat jtuccutic ti tsots yabtel ac'bile. ¹⁷Yu'un iquilcutic ti i'ac'bat xojobal yu'un li Jtotic Diose schi'uc ti i'aq'ue ta ich'el ta muq'ue. Jech i'albat sc'oplal yu'un li Jtotic Dios li oy xojobale: "Li'i ja' Jnich'on, toj c'ux ta co'on. Ximuybaj no'ox yu'un", xi. ¹⁸Ti ica'icutic ti jech ic'opoj yalel ta vinajel li Diose, yu'un te co'ol oyuncutic ta jun vits schi'uc li Jesuse.

¹⁹Ja' yu'un más jna'o'jcutic ti ja' mel el li c'u sba ists'ibabeic comel sc'oplal li Cajvaltíc li buch'utic iyalic sc'op Dios ta vo'onee. Ja' yu'un sc'an chach'unic yu'un ja' chjam o jsatic ya'el jech chac c'u cha'al cantil ti ja' chquiltic o osil c'alal to mi iloc' ta li muc'ta c'anale yu'un sac xa osil. Ja' jech ta xtun cu'untic li c'usi la sts'ibaic comel li buch'utic iyalic sc'op Dios ta vo'onee. Yu'un ja' ta xtun cu'untic ja' to mi tal yic'utic muyel ta vinajel li Cajvaltique. Yu'un mi ital li Cajvaltique, ta jna'tic ti po'ot xa chc'ot ta pasel scotol li c'u sba ts'ibabil sc'oplale. ²⁰Ja' yu'un na'ic me ti tsots sc'oplal ti mu xu' jtuctic no'ox ta jnopbetic smelol li sc'op Dios li ts'ibabile. ²¹Yu'un li buch'utic la sts'ibaic li sc'op Diose, mu stuquicuc no'ox la snopic li c'ustic la sts'ibaique. Ja' i'ac'bat ta sjol ta yo'onic yu'un li Ch'ul Espíritue, ja' sc'op Dios li la sts'ibaique.

Ja' sc'oplal li c'u sba tspaceic li buch'utic sp'isoj sbaic ta jchanubtasvaneje

(Judas 4-13)

2 Li jchi'iltactic ta israelal ta vo'onee oy iloc' jayvo' li buch'utic sp'isoj sbaic ta jchanubtasvaneje. Ja' no'ox jech e'uc li avie, oy buch'u chloc' avu'unic ti sp'isoj sbaic ta jchanubtasvanej e'uque. Ta mucul ta xalic ba li c'usi snopoj stuquic ti ja' no'ox tsocvanic oe. Mu xa xich'ic ta muc' li Cajvaltíc ti ja' itojbat smulique. Li buch'utic jech ta spasi que co'ol schi'uc ta sc'anic

ti ac'o taluc ta ora ti ich' vocole.

²Yu'un ep quermanotic chba spasic jech chac c'u cha'al tspace li jlo'lovanejetique, ja' tspace li c'usi tsc'an stuquique. Ja' ta scojic ti chopol chbat sc'oplal li sc'op Cajvaltlic ti ja' melele. ³Ti jech chaslo'loique yu'un tsc'an ti chavac'beic ataqu'unique. Ja' yu'un albil xa ti ta x'ac'bat yich'ic volol yu'un li Diose. Po'ot xa ta xc'ot sc'ac'alil ta x'ac'batlic.

⁴Li ch'ul ángeletic li ista smulic ta vo'onee i'ac'bat yich'ic volol yu'un li Diose, ijipeic ochel ta c'atinbac. Te oyic o ta ic'al ac'ubal ja' to mi ic'ot sc'ac'alil ta x'ich'bat sc'opic yu'un li Diose. ⁵Ja' no'ox jech e'uc li crichanoetic li naca chopol li c'ustic ispasic ta vo'onee, i'ac'bat yich'ic volol yu'un li Diose, ja' yu'un ital li nojelale. Ja' no'ox icoltaat yu'un Dios li Noee schi'uc li jucvo' li te schi'uc ta barcoe. Yu'un stuc no'ox Noé laj yalanbe li crichanoetic ti ta sc'an li Diose ti ac'o naca lecuc li c'ustic ta spasiq. ⁶Ja' no'ox jech e'uc li buch'utic te to'ox nacalic ta jteclum Sodoma schi'uc ta jteclum Gomorra ta vo'one ti naca chopol li c'ustic la spasiq, i'ac'bat yich'ic volol yu'un li Diose. Ichi'ueic ta c'oc' ta scoj ti naca chopol li c'ustic ispasiq, ipasic ta tan. Ja' svinajeb icom ti ta ono'ox x'ac'bat yich'ic volol li buch'utic mu xich'ic ta muc' li Diose. ⁷Ja' no'ox icoltaat yu'un Dios li Lote yu'un ja' lec li c'ustic ispase. Iyat yo'on li Lote ta sventa ti ja' no'ox la spasic li c'ustic chopol ta sc'an stuquic li crichanoetic li teye, yu'un mu'yuc buch'u ta spajesvan yu'unic.

⁸Li Lot li scotol c'ac'al lec li c'ustic ispase, volol icuch yu'un li naca chopol li c'ustic iyile schi'uc li c'ustic iya'i ti la spasic li crichanoetic. ⁹Ja' yu'un li Diose chquiltic ti iju' yu'un la scolta li snich'nabtaque c'alal isujeic ta spasel c'ustic chopole, yo' jech mu spaseic ta canal yu'un li c'ustic chopole. Yan li buch'utic chopol li c'ustic la spasiq iyac'be yich'ic volol. Te chich'ic o volol ja' to mi ic'ot sc'ac'alil ta x'ich'bat sc'opic yu'un li Diose. ¹⁰Li buch'utic ti ja' no'ox batem ta yo'onic ta spasic li c'ustic tsc'an stuquique, schi'uc ti mu xich'ic ta muc' li buch'utic oy yabtelic ta schabieli buch'utic yich'ojic ta muc' li Cajvaltique, más tsots chich'ic volol. Yu'un tsots yo'onic. Ta stoy sbaic, mu xi'ic ti chopol chalbeic sc'oplal li buch'utic oy yabtelique. ¹¹Yan li yaj'angeltac Dios ti oy stsatsalique, mu chopluc chbat sc'oplal yu'unic ta stojol li Diose li buch'utic oy yabtelique.

¹²Li viniqetic li ta xlo'lovaniq. Ja' jechic jech chac c'u cha'al li chonetic ta balumil ti mu sna'ic snopele, ti tspace ta ora li c'usi ta sc'anique, ti ja' no'ox sventa ta xmileique. Ja' jechic li jlo'lovanejetic ti muc un ta to snopic ti c'usi chaliq, ti chopol chc'opojic ta scoj ti mu sna'ique, ta xch'ayic o sbatel osil. ¹³Ja' stojolic ya'el ti ta ch'ayel chbatic o sbatel osile yu'un ep buch'utic la socbeic yo'on. Mu xqu'exavic, ac'o mi ta c'ac'altic ta spasic li c'ustic chopole. Ti c'alal chatsob abaic sventa co'ol chav'ique, te capal e'uc. Pero li yo'onique chopol, ch'ayemic ta

j'lech'el, ja' yu'un chopol chbat ac'oplalac yu'unic.

¹⁴Naca ants no'ox batem ta yo'onic. Ja' chchan yu'unic li buch'utic mu'yuc to stsatsal yo'onic ta stojol li Diöse. Nopem xa'iic ti xpich'et o yo'onique, ja' yu'un chopol ta x'ileic o yu'un li Diöse.

¹⁵Yu'un ch'ayemic ta be ya'el, ja' yictaojic li lequil be ya'ele. Yu'un ja' jech ta spasic jech chac c'u cha'al ispas li Balaame, ja' li snich'on Beore, ti ispich' o yo'on li c'u yepal taq'uin ta x'ac'bat mi tspas li c'usi chopole. ¹⁶Pero muc bu spas yu'un ipajesat ta sme' sburro. Ac'o mi mu ono'ox sna' xc'opoj li burroetique, pero li sburro li Balaame ic'opoj jech chac c'u cha'al xc'opoj crixchano, ja' yu'un te ipaj o li Balaam ti sp'isoj sba ta yalel li sc'op Dios ta vo'onee.

¹⁷Li jlo'lovanejetique ja' jechic jech chac c'u cha'al jun beo'tic li bu mu'yuc ya'lele. Ja' jechic nojtoc jech chac c'u cha'al li toc li buyuc no'ox chnet'e batel ta ic' jech mu xtal o li jo'e. Yu'un altic ta jch'untic li c'usi ta xalique, mu'yuc sbalil. Mu c'usi ta jtatic o. Pero albil xa li bu chba yich'ic vocol sbatel osile, ja' li ta ic'al ac'ubale. ¹⁸Toj lec ya'el li c'ustic ta xalique pero altic. Ta xalic ti scotol xu' ta jpastique yo' ac'o spich' o yo'onic li quermanotactic li ja' to yacalic ta yictael li c'ustic chopol tspasic schi'uc li schi'iltaquique. ¹⁹Jech chalbeic li buch'utic yich'o'jic ta muc' li Cristoe: “Laj xa scoltautic li Cristoe ja' yu'un mu'yuc xa c'usi chispasutic ta mantal”, xutic. Pero li stuquique mu xa'i sbaic ti pasbilic

to ta mantal yu'un li c'ustic chopole. Yu'un li buch'u ta spase ta canal yu'un li c'usi chopole ja' xa yajtunel o li mulile. ²⁰Li buch'u yictaoj li c'ustic chopol ta sventa ti laj xa yich' ta muc' li Cajvaltice Jesucristoe, ja' li Cajcoltavanejtique, mi ta ts'acal ta spich' o yo'on li c'ustic chopole, mi laj ono'ox spase, más to chopol tspas jech chac c'u cha'al ta vo'onee. ²¹Ja' más lec ti muc bu sna'ojuc li lequil bee; ja' chopol ti sna'oje, ti ta ts'acal la scha'pas li c'ustic chopole, ti iyicta li lequil mantal li yaloj li Cajvaltique. ²²Ja' jech ta spasic ya'el jech chac c'u cha'al oy jech chcaltique: “Li ts'i'etique chba scha'lo' li xeique”, xijchiutic. Jech chcaltic nojtoc: “Ac'o mi ja' to iyich'ic atintasel li me'chitometique, pero chba scha'bal sbaic ta ach'el”, xijchiutic.

Ja' sc'oplal li c'u sba ta xljaj li vinajel balumile

3 ¹⁻²Li jo'oxuc li co'ol quich'o'jtic ta muc' li Cajvaltique, ti c'uxoxuc ta co'one, schibal xa velta chajc'o'ponic ta carta. Li sba jcarta schi'uc li schibal jcarta li li' ta jts'ibaboxuque, ja' ta jt'abboxuc ava'iic, jo'oxuc li tuq'uibem xa avo'onique, ti ac'o xana'ic li c'ustic yaloj comel li buch'utic iyalic sc'op Dios ta vo'onee. Schi'uc ac'o xana'ic li smantal li Cajvaltique, ja' li Cajcoltavanejtique, ja' li la ono'ox calcutic ava'iic, jo'oncutic li yajtacbalaluncutic li Cajvaltique.

³Ja' tsots sc'oplal ti xana'ic ti ta to xlic ep jlabanvanejetic li c'alal po'ot xa li slajeb c'ac'ale. Mu xich'ic ta muc' li Diöse. Ja' no'ox batem ta

yo'onic ta spasic li c'ustic chopol ta sc'an stuquique. ⁴Jech ta xalic: "Mu xach'unic ti chtal nojtoc li Jesuse. Yu'un vo'one xa slajelic li buch'utic jech i'albatique. Staoj o yav ti c'u sba imeltsaj li balumile c'alal to tana, muc bu chjel", xi chlabanvanic. ⁵⁻⁶Ti jech ta xalique, yu'un mu jamluc ta xalic li c'usi ic'ot ta pasel ti c'alal oy xa'ox vinajel balumile. Ta sliqeb c'alal imeltsaj li vinajel balumil yu'un li Diose, ta jup'el sc'op no'ox imeltsaj. Li nabe istsob sba, ibat ta kujot, jech ivinaj o li balumile. Pero capal jutuc ta jo' icom li balumile yo' jech ta xch'i li c'ustic ta jts'untique. Ta más ts'acale c'alal oy xa'ox li crixchanoetique, laj yal nojtoc ti chcha'noj ta jo' li balumile. Pero ic'ot ta pasel, jech ilajic o scotol li crixchanoetique. ⁷Yaloj nojtoc li Dios ti ta xc'ot sc'ac'alil ti ta xc'ac' scotol li vinajel balumil li'i, ja' to ti c'alal chc'ot sc'ac'alil ta xich'be sc'op scotol li buch'utic mu xich'ic ta muc' li Diose. Ja' xa o yorail ta xbatoc o ta ch'ayel sbatel osil.

⁸Li jo'oxuc ti c'uxoxuc ta co'one, mu me xch'ay ta ajolic ti co'ol schi'uc jun c'ac'al cha'i jmil jabil li Cajvaltique. ⁹Oy buch'utic ta xalic ti mu xc'ot xc'opoj li Cajvaltique, pero mo'oj. Melel li c'usi yaloj li Cajvaltique. Ti jech mu xtal ta orae, yu'un mu sc'an ti ta ch'ayel ta xbat junuc li crixchanoetique. Ja' yu'un ta smala ora yu'un tsc'an ac'o yictaic li c'ustic chopol tspasique.

¹⁰Ta ono'ox xtal li Cajvaltique pero mu jna'tic c'u ora. Ja' jech chac c'u cha'al jun j'elec' ti mu jna'tic c'u ora ac'ubal ta xtale.

Chtal sch'ay scotol li c'ustic li' oye. Xjumumet no'ox c'alal ta xc'ac' ta c'oc' li vinajele, jech ta xch'ay o. Li c'ustic te xjobianic ta vinajele ta xc'ac' scotol. Jech nojtoc li balumile schi'uc scotol li c'ustic li' oye, ta xc'ac' scotol.

¹¹Ja' yu'un sc'an ti lec scotol li c'ustic chapasique. Junuc avo'onic ich'ic ta muc' li Diose yu'un chljaj ta c'oc' scotol li c'ustic chquiltique. ¹²Muybajanic no'ox malaic li c'u ora chtal sch'ay scotol li Diose. Pucbeic li sc'ope, yora to me li avie. Ta me xc'ot sc'ac'alil ti chljaj ta c'oc' li vinajel balumile. ¹³Pero li jo'otique yalojbutic xa li Dios ti ja' te chijc'ot ta ach' vinajel balumile, ja' li mu'yuc xa c'usi chopol teye.

¹⁴Ja' yu'un, jo'oxuc ti c'uxoxuc ta co'one, yo' to chamalaic li c'u ora ta xc'ot ta pasele, ja' me pasic li c'ustic leque, jech mu'yuc amulic cha'ileic c'alal chac'otic ta stojol li Diose. Jun avo'onic ta stojol chayilic. ¹⁵Na'ic me ti yu'un ta sc'an li Dios ti chijcolutique ja' yu'un jal chismalautic. Jech ono'ox iyalboxuc ta scarta e'uc li quermanotic Pablo li c'ux ta co'ontique, yu'un jech i'ac'bat sp'ijil yu'un li Diose. ¹⁶Jech chal scotol scarta li Pabloe. Li scartae oy bu vocol ta a'ibeel smelol. Li buch'utic mu c'usi sna'ique, ti mu'yuc stsatsal yo'onic ta stojol li Diose, ta sjelbeic smelol jech chac c'u cha'al ta sjelbeic smelol li sc'op Dios li ts'ibabil ono'ox ta vo'onee. Ti jech ta spasique, stuc no'ox tsch'ay sbaic.

¹⁷Jo'oxuc ti c'uxoxuc ta co'one, laj xa calboxuc li c'usi tspasic li buch'utic ja' no'ox tspas li c'usi

tsc'an stuquique. Ja' yu'un q'uelo
 me abaic, mu me xaslo'looxuc.
 Yu'un mi la slo'looxuque, ta xchibaj
 avo'onic ta stojol li Cajvaltique.
¹⁸Pero sc'an más ac'o tsatsubuc

avo'onic ta stojol li Cajvaltique
 Jesucristoe, ja' li Cajcoltavanejtique.
 Ac'o co'olajuc avo'onic achi'uquic.
 Stuc ac'o ich'biluc ta muc' sbatel
 osil.